



Missingersuutit pillugit isumaqatigiissut 2025–2026


*Illoqarfiit pingaarnersaata kommuneqarfia suli
siuariartortoq*



Inuit Ataqatigiit



Demokraatit



Siumut



Naleraq

Imai

Aallaqqaasiut.....	3
Naleqartitat, tunngaviit aamma inunnik isiginnittaaseq	3
Aningaasaqarnikkut imminut napatissinnaaneq inerikkiartornerlu	4
Aningaasaqarnermut inuussutissarsiornermullu ataatsimiititaq	6
Inuussutissarsiorlut oqallittarfii.....	6
Nuuk - Issittumi kulturikkut illoqarfiit pingaarnersaat	6
Nuummi kulturikkut aallarnisaasunullu illu	7
Paamiuni kulturikkut aallarnisaasunullu illu	7
Nuup Bussii aamma Iserit	7
Nuuk Maritime Network.....	8
Qeqertat ineriartortinnerat	8
Pilersaarusiorneq	9
Meeqqat, ilaqutariit atuartitaanerlu.....	10
Qisuariarnermit pilersaarusiornermut	10
Nalerisimaneq, pimmatiginninnermik akiuineq ilikkagaqaqatigiinnerlu	11
Siusissukkut iliuuseqarneq aamma ilaqutariinnik tapersersuineq	11
Sunngiffimmi aamma najukkamut qanittumi neqeroorutit amerlanerusut	12
Utoqqarnut isumassuiner mullu ataatsimiititaq	13
Isumaginninnermut inunnullu innarluutilinnut ataatsimiititaq	14
Inoqarfinnut ataatsimiititaq	15
Kommunimi tamarmi aalisarnermik piniarnermillu inuussutissarsiuutit pitsanngorsarneqarnerat	15
Teknikki avatangiisillu.....	17
Eqikkaaneq	19

Aallaqqaasiut

Kommuneqarfik Sermersooq allanngoriartorfiup nalaani naatsorsuuteqarfiungaatsiartumilu inissisimavoq. Innuttaasut amerliartornerat, atugarissaarnermut pisariaqartitsinerup qaffakkiartornera aamma piffissaq manna sullissinermut, illoqarfiup ineriartorneranut piujuartitsinermullu nutaanik piumasaqaateqarfiusoq nalaappagut. Tamakkua saniatigut innuttaasut tatiginninnerisa, toqqissisimanissaasa aamma nalerisimanissaasa attanneqarnissaat uagut suliasatta pingaarnersaraat.

Taamaattumik kommunalbestyrelse ukiunut tulliuttunut erseqqissumik siunnerfilimmik missingersuutit pillugit isumaqatigiissummik ataatsimoortumik isumaqatigiissusiorpoq. Inuiaqatigiinnik nukittuunik, imminnut napatissinnaasunik aamma naapertuilluartunik pilersitsinissamik ataatsimoorluni kissaatigisaq isumaqatigiissummi tunngaviuvoq, ilaatigut innuttaasunit tamanit misigineqassaaq kommunip kikkunnnulluunniit atuunnerata - sumiluunniit najugaqartunut malugineqarsinnaanissaa.

Naleqartitat, tunngaviit aamma inunnik isiginnittaaseq

Kommunalbestyrelse ataatsimoorussaminik aalajangersimasumik inunnik isiginnittaaseqarpoq, tassunga tunngaviuvoq inuit ataasiakkaat ataqqineqarnerat aamma kikkut tamat ataqqineqarlutik pineqarnissaannik upperinninneq.

Immitsinnut ima pisussaaffilerpugut:

- Politikkimik ammasumik erseqqissumillu ingerlatsissalluta, aalajangiinerit innuttaasunit malinnaaffigineqarsinnaallutik
- Partiit, ingerlatsiviit, inuussutissarsiortut aamma innuttaasut tamatta suleqatigiinnikkut oqaloqatigiinnikkullu sulianik ingerlatsissalluta
- Angusanut tamaginnut akisussaaffimmik tigusissalluta pissutsillu piviusut takutitaat naapertorlugit aaqqiissuteqarnissamut piumassuseqarluta

Inunnik isiginnittaaseq taanna sulisutta periuserisaasigut aamma pissusilersuutaasigut takuneqarsinnaassaaq, taakkuami innuttaasunik immitsinnullu qanoq naapitsisarnitsinni pissusilersuutaat kommunalbestyrelsip naatsorsuutigisaannik ersersitsisuussapput.

Pissusilersuutissatut naatsorsuutigisaq inussiarnersuunermik, ataqqinninnermik aamma suliassaqarfimmut akisussaassuseqarnermik tunngaveqarpoq, tamannalu suliffeqarfissuurtut aaqqiissuussaannerup tamarmiusup kulturianut sunniuteqassaaq - atuarfinnit aamma utoqqaat angerlarsimaffiinit allaffissornermut kiisalu aqutsinermut.

Saniatigut kommunalbestyrelsimit kissaatigineqarpoq pinngorartitseqatigiinneq aaqqiissuussaannerusoq atorlugu sulianik ingerlatsissasugut – tassa innuttaasut, sulisut aamma soqutigisaqatigiit aaqqiissutinik ataatsimoorlutik ineriartortitseqatigiinnerannik periaaseqartoqarneratigut. Tamanna isumaqarpoq innuttaasut tusarniaanerni peqataatinneqaannaratik kisianni isumassarsianik, ingerlatseriaatsinik aaqqiissutissanillu aallaqqaataanit naggatissaanut ilusilersueqataassasut.

Sanarfinermut Avatangiisinullu Ingerlatsivimmi nunaminertanik qinnuteqaatinik sulianit misilittakkat ersersippaat siusissuklut peqataatitsillunilu ingerlatsinerit aaqqiissutissanik pitsaannerusunik aamma illuatungeriit akornanni annermik paaseqatigiinnermik pilersitsisartut.

Anguniagaq tassaavoq innuttaasut tamarmik kommunimik naapitsinerminni naleqartinneqarlutik ataqqineqarlutillu naapinneqartarnissaat - aamma ataatsimoorluta suliffeqarfissuurtut aaqqissuussaq pitsaanerusumik suleriaaseqartoq, inuppalaarnerusooq ilinniarfiunerusorlu pilersissavarput.

Aningaasaqarnikkut imminut napatissinnaaneq ineriikkiartornerlu

Aningaasaqarneq isumatusaartumik sukannersumillu aqunneqassaaq, taamaaliornikkut Kommuneqarfik Sermersooq isumannaatsumik aamma atugarissaarnermik immerutiginninnani ingerlatsisinnaavoq. Siuariartorneq patajaatsoq ineriartornerlu isumannaatsoq attanneqassappata aningaasaqarneq torersoq pisariaqarpoq. Kommuneqarfik Sermersuup ukiuni qaangiuttuni patajaatsumik ineriartortinneqarnera ingerlatiinnarneqassaaq, innuttaasut minnerunngitsumillu suliffeqarfiit ilisimassavaat sunik naatsorsuutigisassaqassanerlutik. Aningaasartuutit ineriartornerannut missiliuutit pitsaanerusut qulakkeersinnaajumallugit 2027-mut missingersuummit qinnutigineqassaaq ukiuni sisamani missingersuutit inatsisitigut pisussaaffiusut saniatigut ukiunut tulliuuttunut sisamanut nalunaarsukkanik aamma peqartalernissaq.

Anguniagaq pingaarutilik alla tassaavoq aningaasaateqarfinnut aamma avataani aningaasaliisinnaassuseqartunut naapertuuttunut aaqqissuussaasumik aningaasanik qinnuteqarnernik sulianik aallartitsinissaq, kommunimi suliniutinut allanut tapertatut atorineqarsinnaasunut. Tassunga atasumik fundraiserimik (aningaasassarsiortartumik) atorfinitsitsisoqassaaq, taanna ingerlatsiviit assigiinngitsut sullittarlugit kommunimut ikiuutissaaq.

Suliffeqarfissuarmi aaqqissugaanikkut misissueqqissaarneq: innuttaasunik suliffeqarfinnillu sullissineq pitsaanerusooq

Kissaatigineqarpoq kommunimi suliffeqarfissuatsinni aaqqissugaanikkut misissueqqissaarnermik aallartitsisoqassasoq, tassuunakkut Kommuneqarfik Sermersuumi aaqqissugaaneq, suleriaatsit aamma akisussaaffinnik inissiinerit nakkutilliiffineqarnerannik ataatsimoorumik ingerlatsisoqassaaq. Innuttaasut aamma suliffeqarfiit kommunimik ataqatigiisumik saaffikkuminartumillu misigisaqarnissaat anguniarneqarpoq - akisuttissat piffissaagallartilugu utertinneqartarlutik, suleriaatsit erseqqissuullutik sullissinerlu suliamut tunngasumik qaffasissumik pitsaassuseqartoq ataqqinnittorlu piullutik.

Misissueqqissaarisooqarneratigut politikkikkut pingaarnersiukkat aamma allaffissornikkut aaqqissuussap akornanni ataqatigiisumik sulisoqarnissaanik pitsanngorsaasoqassaaq, akisussaaffimmik erseqqinnerusumik pilersitsisoqarluni aamma aalajangigassat suliarineqartarnerannik pisariillisaasoqarluni kiisalu allaffissornermik marloqiusamillu sulinermik annikillitsilluni. Taamaaliornikkut pingaarnertut suliaassanut piffissamik pilersitsisoqassaaq, ulluunerani neqeroorutinut, atuarfinnut, utoqqarnik paaqqutarinninnermut, oqartussatut suliaqarfimmut aammalu kiffartuussinernut.

Tassunga tunuliaqutaapput ineqarnermi aamma illoqarfimmik ineriartortitsinermi, utoqqarnut suliaasaqarfimmi aamma inuussutissarsiornermi suliaasaqarfinni assigiinngitsuni ineriartortitsinermik suliaassat angisuut kommunimit ingerlanneqartussaanerat. Misissueqqissaarnermi immikkut erseqqissarneqassapput suliaasaqarfiit naapertuutinningsunik suliaasaqarfinnut arlalinnut tunngasut, akisussaaffiit erseqqinningsut imaluunniit sullissinerit sivisuut - taakkununga ilanngullugit innuttaasut suliffeqarfiillu angalasarnerat soorluttaaq soraarnerussutisiat, sanaartornissamut akuersissutit aamma nunaminertanut inuussutissarsiornermilu suliat - kiisalu sulisutut atuuffiit aamma ingerlatsiviit ingerlanneqarnerisa akornanni suleqatigiinnerit taamatullu politikkimik sulialinnik sullissinerit. Misissueqqissaarnermit suliaassanik aamma oqartussaaffinnik inissiineri aaqqiissutissat

siunnersuutigineqassapput, kisianni aqutseriaatsimi allannguutini imaluunniit ataatsimiitit aamma ingerlatsiviit amerlassusiannik saqqummiussiffiussanngilaq.

Suliffeqarnermut isumaginninnermullu suliaasaqarfik assingusumik sukumiisumik misissuiffigineqassaaq, soorluttaaq aamma Meeqqanut Ilaqutariinnullu Ingerlatsivimmik taamannak ingerlatsisimasugut. Innuttaasut katitigaanerisa allanngoriartornerata erseqqissumik ersersippaa ingerlatsiviup angisuup katitigaasullu sukumiinerusumik misissorneqarnissaanut piffissanngortoq. Misigaarput innuttaasut inuuniarnikkut ajornartorsiuteqartut amerliartuinnartut Nuummukartartut, aamma aningaasartuutit malunnaatilimmik qaffakkiartortut, saniatigut tamanut naammaginartumik sullissinerup attatiinnarsinnaanera ajornarneruleriartortoq. Kommuni aningaasartuutai amerligaluttuinnarput, taamaattumik suliaasaqarfik misissortariaqarparput sutigut pitsanngorsaasinnaanarluta saniatigullu paasiumallugu sullissinermik pitsaannerusumik qanoq tunniussinnaanarluta. Matumani pineqartut pingaarnerit tassaapput:

- Inunnut innarluutilinnut suliaasaqarfik
- Utoqqarnut suliaasaqarfik
- Siusinaartumik pensionisiallit
- Suliffissaqartitsineq
- Angerlarsimaffeqanngitsunut suliaasaqarfik

Ilanngullugu piffissap ilaani sulisinnaasunik tigusinissaminut kommune piareersimassaaq. Siusinaartumik pensionisiallit amerlassusiat appartissagutsigu suliffissaqartitsivik tamanut ilumut inissaqartitsinersoq qulakkeertariaqarparput.

Pissarsiassatut naatsorsuutigisaavoq sullissinerup sivikinnerulernissaa, kukkunerit ikinnerusut, atuuffiit aamma akisussaaffiit erseqqinnerusut kiisalu politikkip, periusissiat aamma ingerlatsinerup imminnut ataqatigiinnerulernissaat. Misissueqqissaarneq suliaasaqarfiit assigiinngitsut suleqatigiinnerannut nukittorsaataassaaq aamma innuttaasut suliffeqarfiillu tatiginninnerannut qaffassaataalluni.

Aningaasaqarnermut inuussutissarsiornermullu ataatsimiititaq

Inuussutissarsiornermik ineriartortitsineq Kommuneqarfik Sermersuup siunissaani tunngaviusussaavoq pingaaruteqarluinnartoq. Inuussutissarsiorneq nukittoq aqqutigalugu isertitassat pilersinneqassapput, taakkua ataatsimoorluta atugarissaarnissatsinnut aningaasaliisuussapput - meeqqerivinnit aamma atuarfennut utoqqarnik paaqqutarinninnermut kulturimullu. Taamaattumik kommunalbestyrelsimit kissaatigineqarpoq inuussutissarsiutit illoqarfiit pingaarnersaannik kommunillu sinneranik kivitsisut pitsanngorsarneqassasut, kiisalu kommunip inuussutissarsiortullu akornanni qanimut suleqatigiinnerat aamma pisussaaffeqarluni suleqatigiinnertut ineriartortinneqassasut.

Inuussutissarsiortut oqallittarfii

Kommunip pitsaasumik inerikkiartorfiusumik siuariartornera ingerlaannassaaq – siuariartornerlu taanna Nuummur, Paamiunur, Tasilamut, Ittoqqortoormiunur aamma inoqarfinni mikinerusunut tamanut iluaqutaassaaq. Tamanna tapersersorniarlugu kommunalbestyrelsimit suleqatigiinneq pitsanngorsarneqassaaq suliffeqarfiit inuussutissarsiortut oqallittarfii attaveqatigiittarnerillu suleqatigiiffiusut aqqutigalugit.

Nuummi Oqallittarfik illoqarfinni suliffeqarfiit suleqatigalugit pilersinneqartoq suleqatigiinnermut attaveqatigiiffittut atuuppoq aamma kommunip inuussutissarsiortullu akornanni suliat suleqatigiissutigineqarneranni atuulluni. Oqallittarfiup siunertaraa oqaloqatigiinnerup pitsanngorsarneqarnera aamma ataatsimoorluni aaqqiissutissanik pilersitsinissaaq illoqarfiit pingaarnersaat pillugu periusissiap piviusunngortinneqarnissaanut aamma ineriartortitsinermit puijuartitsisumillu ingerlatsinissamut iluaqutaasussamik.

2026-mi ukiup affaata suilliup aallartinnerani illoqarfiit sinneri aamma aallartisaaffigineqassapput maanna inuussutissarsiornermik siunnersortit atuuttut aaqqiissugaanermikkut qanoq allannguiffigineqarsinnaanerannik nalilersuinermit inuussutissarsiortut peqataatinneqassallutik.

Nuuk - Issittumi kulturikkut illoqarfiit pingaarnersaat

Nuuk tassaannaassanngilaq Kalaallit Nunaanni kulturikkut illoqarfiit pingaarnersaat, tassaassaarli Issittumi kulturikkut illoqarfiit pingaarnersaat - kulturi, inuussutissarsiorneq aamma pinngorartitsineq ataatsimut ingerlaqatigiillutik illoqarfinni uummaarissutsimik pilersitseqatigiissut. Kulturi illoqarfiup ineriartorneranut, ataatsimooqatigiinnermut aamma kinaassutsimut qitiusumik nukiuvoq. Tulluusimaarnermik pilersitsivoq, tikeraarusuttunut kajungilersitsivoq illoqarfillu illoqarfittut nutaaliaasutut aamma Issittumi qitiusoqarfittut uummaarissutut inissisimaneranut nukittorsaataalluni.

Misigisaqartitsiniarluni tunisassiorneq suleqatigiit akornanni ineriartortinneqassaaq, tassani kommune inunnik ataatsimuulersitsinermit aamma Nuup nunarsuup assingani ersarissuuneranut sammisalinnut tapersersuissaaq. Illoqarfinni eqqumiitsuliat ersarinnerulernissaannut kommunalbestyrelse suleqataavoq najukkami eqqumiitsuliortut suleqatiginerisigut.

Kulturi aamma inuussutissarsiortut pinngorartitsisut illoqarfiup ineriartorneranut akuusutut isigineqarput. Inooqatigiinnikkut aammalu aningaasaqarnikkut nalilinnik pilersitsipput - Nuup ilusilersorneqarneranut ilanngussaqaqataallutik maani ileqqutoqqat nutaaliornerullu naapiffianni. Suleqatigiinneq aamma najukkami suleqatigiiffiit pingaartinneqarnerisigut Nuuk suli tassaassaaq pissusissamisoortumik nunamut

tamarmut kulturikkut kateriffiusoq - inuit naapittarfiat, isumassarsiat pinngorarfiat aamma Kalaallit Nunaata siunissamit ilusissaanik tikkuussisoq.

Nuummi kulturikkut aallarnisaasunullu illu

Pinngorartitsinerup ineriartortinneranut atasumik kulturikkut aallarnisaasunullu illu nutaaq Pukuffik 18-imi, 800 m² miss. annertussusilik pilersinneqarpoq. Illu ataatsimooqatigiinnut eqeersimaartunut sinaakkusiissaaq tamaani nipilersortartut, eqqumiitsuliortut, ilusilersuisartut, assiliisartut, filmiliortartut aallarnisaasullu isumassarsianik ineriartortitsissapput, ilisimasani avitseqatigiillutik aamma kulturit inuussutissarsiutillu akornanni suleqatigiinnernik nutaanik pilersitsissallutik.

Illu eqaatsumik tamatigoortumillu atuuffeqassaaq nipilersortartut sungiusartarfiattut, nipigissaasarfittut, eqqumiitsuliortunut sullivittut, aallarnisaasunut inissatut, iggavimmik ataatsimoorussamik peqarluni, soorluttaaq pikialartitsinernut mikinerusunut isiginnaariartarfimmik issiaartarfimmillu inissaqartitsisoqassasoq. Siunertaavoq pinngorartitsinermik inuussutissarsiutit pitsanngorsaavigineqarnissaannik tapersiinissaaq illoqarfimmilu eqqumiitsuliortut sammisallillu ineriartornermut tunisassiornermullu aningaasarsiornermut naleqqunnerusunik sinaakkuteqartinneqarnissaat.

Paamiuni kulturikkut aallarnisaasunullu illu

Kommunalbestyrelsimi kissaatigineqarpoq Paamiuni najukkami ineriartortitsisoqassasoq nutaaliornermut, inuussutissarsiornermut kulturikkullu katersuuffimmik nutaamik pilersitsineq aqqutigalugu. Taamaattumik illoqarfiup pisoqartaani ineriartortitsinermut kulturikkullu sullivimmik nutaamut sinaakkusiinnaasumik illumik pissarsinissamut periarfissanik ujaasisoqarpoq.

Aammattaaq sullivimmi tassani anguniagaassapput:

- takornariaqarneq aamma piujuartitsinermik tunngaveqarluni ineriartortitsineq
- Kittat suleqatigalugit ammerinermik siuarsaaneq
- aallarnisaanerit aamma inuusuttunut suliniutit

Suliffeqarfinnik nutaanik pilersitsinissaaq, najukkami inuussutissarsiornermut periarfissat pitsanngorsarnerat aamma illoqarfimmi kulturikkut assassornermilu piginnaasat pitsaasut ingerlateqqinneqarnissaat siunertaavoq.

Umiarsuit takornariartaatit 2025-mi tikittarnerisa uppernarsisippaa Paamiut pingaartumik umiarsuit takornariartaatit eqqarsaatigalugit periarfissaqarluartut. Taamaattumik kommunalbestyrelsimi inuussutissarsiornermut immikkoortortaq suliniutissatut siunnersuutininik saqqummeeqquneqarpoq, illoqarfimmi aamma najukkami sammisallit takornariaqarnerup iluani ineriartornissaannut siuarsaataasinnaasunik.

Nuup Bussii aamma Iserit

Nuup Bussii aamma Iserit kommunimit pigineqarput, taamatuttaaq kommunimi innuttaasunit. Ingerlatsiviit sullissinerat inuiaqatigiit pisariaqartitaannut tulluartsuussaaq. Taamaattumik kommunip ingerlatsiviutaanni piginnittuunermut periusissiat ilusilersorneqassapput.

- Nuup Bussii: Bussiutileqatigiiffiup qanoq ineriartortinneqarnissaanut periusissiaq piffissamut pilersaarummik imaqaassaaq, qaqugu bussinut inissiivinnut aningaasaliissaagut, qaqugu aamma qanoq bussit amerlineqassanersut, qanoq illoqarfik sullinneqassanersoq il.il.
- Iserit: Kommunalbestyrelsi ukiuni kingullerni 100 mio. kr.-nit ikinnerunngitsunik Iserimut aningaasaliisimavoq, taakkunannga 45 mio. kr. Tasillamut kiisalu 40 mio. kr. Paamiunut. Kommunalbestyrelsip kommuni tamakkerlugu inissaqarniarnikkut qulakkeerinninnissamik suliaqarnertik nangeqqissavaat. Ukiunut qulinut tulliuuttunut ineqarnermut pilersaarummik suliaqartoqassaaq. Illoqarfitsinni unammilligassat assigiinngitsut qanoq iliuuseqarfigissavagut, inissiaqarnermut tunngatillugu qanoq ittut suullu kissaatigaavut. Sulisut inissiaat qanoq pissavagut, Isumaginnittoqarfik aqqutigalugu inissiaqarnermut tunngasut qanoq pissavagut?

Nuuk Maritime Network

Kommunalbestyrelsimi suli kissaatigineqarpoq Nuuk Maritime Networkimik suleqateqarnerup pingaartinneqarnissaa aamma attaveqatigiiffiup ineriartoqqinnissaanut tapersersuinnarnissaa. Taamaaliortoqassaaq allaffissornermit nukissanik, pilersaarusiortuni oqaloqatigiinnerit aamma suliniutinik tapersersuinerit aqqutigalugit sammisanik amerlanernik, niuerfissatut periarfissanik nutaanik aamma illoqarfimmi akileraarutitugut isertitanik amerlanernik pilersitsisoqaqqullugu. Saniatigut takorluugaq piviusunngorpat suliaqarfigimmi piginnaasat suut siunissami pisariaqartinneqassanersut qulaajarumallugit Nuuk Maritime Networkimik suleqateqartoqassaaq. Ulluinnarni ingerlatsinerimut pikkorissarnerit kisimik pineqanngillat, pineqarportaarli ilinniartitaanermik piginnaasanillu qaffaanissamut periuiseqartoqarnissaa, taanna inuussutissarsiutinut Nuummumut kajumilersitsisussanut naleqquttuussalluni.

Qeqertat ineriartortinnerat

Danskit naalagaaffiat piffissami aggersumi Qeqertani umiarsualivimmik alliliinerimut peqataassaaq. Tassunga atasumik kommunalbestyrelsimi kissaatigineqarpoq taassuma tungaanut aqqusinniornissaaq naalagaaffimmit isumagineqassasoq, suliniut pitsaasumik ataqaqatigiissumillu piviusunngortinneqarsinnaaqqullugu.

Kommunimit ilanngullugu qulakkeerneqassaaq sumiiffiup pineqartup eqqaanniittut sanaartorfigissarneqarnissaasa piareerneqarnissaat, tassunga ilanngullugu putup aqqinneqarnissaa. Siunertaavoq suliffeqarfinnut sullissisussanut sinaakkutissat pitsaanerit pilersinneqarnissaat, suliaqarsinnaalerniassammata. taamaalillutillu umiarsuarnik amerlanernik sullissinissamut annertusaasinnaaqqullugit. Qeqertani attaveqaasersuutit aamma inuussutissarsiornermut atortulersuutit ataatsimoorlutik kommunimi imarsiornermik inuussutissarsiummut nukittorsaassapput ingerlatsereersunut aamma nutaanut ineriartortinnerimut periarfissanik nutaanik pilersitsissallutik.

Naalagaaffiup sakkutuunut umiarsualivimmik pilersitsinerata kinguneranik susoqarfiunerulernerata kingunerisaanik aqqusinikkut angallannerulernissaaq naatsorsuutigineqarmat kommunalbestyrelsimi ilanngullugu qinnutigineqarpoq Nuup aamma Nuussuup akornanni sullorsuup allilernerneqarnissaa, taamaalilluni biilit illugiillutik ingerlaarsinnaaleqqullugit. Aqqut taanna ullumikkut naammanngereerpoq, aamma aqqusinikkut angallattut amerlanerulernerat tattorliuunnermik suli ajornerulersitsissaaq aamma biilertunut, sikkilertunut pisuttunullu isumannaallisaanikkut unammilligassanik annernik pilersitsissalluni.

Biilit illugiillutik ingerlaarfissaannut alliliineq iliuuserineqartussatut pingaarutilittut nalilerneqarpoq inuussutissarsiorfinngorumaartussat eqqarsaatigalugit aqqusinikkut angallannerit annertusissammata isumannaatsumik eqaatsumillu ingerlaartoqartarnissaannik qulakkeerinneqataassammat kiisalu ajutoortoqaratarsinnaanerani tattorliuuffigineqartarneranillu annikilliliissammat.

Pilersaarusiorneq

Siunissami Nuummi pisariaqartinneqartussat naammassisinnaajumallugit illoqarfiit pingaarnersaannut periusissiaq naapertorlugu kommunimit siunissaq ungasinnerusoq eqqarsaatigalugu illoqarfimmut pilersaarusiorneq qulakkeerneqassaaq. Tamanna ilaatigut isumaqarpoq inissianut, inuussutissarsiuqartunut aamma illoqarfiit pingaarnersaanni atuuffinnut assignngitsunut nalinginnaasunut nunaminertanik qulakkeerinnittoqassasoq. Suliassaq taanna kommunalbestyrelsimi pingartinneqaqaaq, taamaattumillu aaqqiissutissat assignngitsut, soorlu aningaasaqarnermut tunngasut sanaartukkatigullu Kuanninnguit Siorarsiorfiullu tungaannut ineriartortitsisinnaanerit misissorneqarput. 2026-mi ukiup affaani siullermi innuttaasunik soqutigisalinnillu peqataatitsisoqarnissaanik kissaateqartoqarpoq, alliliinissamut siunnerfissanik annertussusissanillu erseqqissaataasussamik, innuttaasut inussutissarsiortullu suleqatigalugit ineriartorneq aningaasaqarnerlu illoqarfimmi pisariaqartitsinermit naleqqussarneqaqqullugit.

Taakkua saniatigut inuussutissarsiornermut politikkimik aamma takornialerinermit ornitassanik ineriartortitsinermit pilersaarummik nutaamik suliaqartoqassasoq kissaatigineqarpoq, inuussutissarsiorneq inuiaqatigiinni pisariaqartinneqartut pinngortitalu nammassinnaasai oqimaatigiissumik ineriartortissinnaaqqullugit. Tassunga aningaasanik illuartitsisoqarpoq ilisimatusarluni takornialerineq aamma kulturimik ingerlatitseqqiinermit atugassanik, taakkua ilisimatusarnermik suliallit kulturilerinermillu ingerlatsisut peqatigalugit ineriartortinneqassapput.

Suliniutit allat kommunalbestyrelsimi allaffissornermut inassutigineqartut makkuupput:

- Qanoq ililluni illoqarfinni tamaginni taxanik ingerlatsinerup qulakkeerneqarsinnaanerata paasiniarneqarnera.
- Piffissami suliffiusumi kajumissutsimik suliaqarnermut periarfissat annertusinissaannut najoqqutassiornissaq.
- Siunertat allaaserineqarnerat nutarsarneqassapput, matumani sammisat paasissutissartaat ilanngunneqarnerannik aamma suliaqartoqassaaq.

Meeqqat, ilaqtariit atuartitaanerlu

Meeqqavut siunissaraavut. Taamaattumik kommunalbestyrelsimit pingaartinneqarpoq Kommuneqarfik Sermersuumi meeqqanut inuusuttunullu tamanut atuartitsinermit avatangiisit pitsaasut, toqqissisimanartut ineriartuutaasullu pigineqarnissaat.

Atuarfimmi pitsaasunik avatangiiseqarnissamut pisinnaatitaaffik tamanut tunngaviuvoq. Atuarfik Samuel Kleinschmidt (ASK) aamma Ukaliusap Atuarfiani (USK) oqoqartoq paasineqarmat, kommune pilertortumik qisuariaateqarpoq atuartitsinermit inissanik allanik nassaarpoq taamaaliornikkut atuartut sulisullu piaarnerpaamik atuartitsineq pissutsit toqqissisimanartut atorlugit nangissinnaaniassammassuk. Suliniut taanna kommunalbestyrelsimit peruserineqartumut erseqqissumut takussutissiivoq: isumannaallisaaneq ilikkagaqarnerlu imminnut akerleriittut inissinneqanngisaannassasut.

Taakku saniatigut Qeqertarsuatsiaani Paamiunilu meeqqat atuariisa pitsanngorsaanernik annertuunik pisariaqartitsinerat erseqqippoq. Illut maannamut issusiat nalerisimanermit ilikkagaqarsinnaassutsimullu pitsaanerpaamik atugassaqartitsinngillat, taamaattumillu iluarsartuussinerit kommunalbestyrelsimit aningaasaliisoqarpoq. Qeqertarsuatsiaat eqqarsaatigalugit aasartinnagu atuariup iluarsartuunneqarnera aallartinneqarsimassaaq. Paamiuni init atuartitsiviusut iluarsartuunnerannik suliaq ingerlasoq nanginneqassaaq, kisianni misissueqqaarneq naammassineqariarpat kommunalbestyrelse iluarsartuussinerup tulluuttup annertussusissaa pillugu politikikkut aalajangiissaaq, tassunga ilanngullugu eqaarsaartarfimmik nutaamik pisariaqartitsineq pillugu aalajangiivigineqassalluni.

Qisuariarnermit pilersaarusernermut

Kommunalbestyrelsimit kissaatigineqarpoq kommunip illuutai pillugit siunissamut ungasinnerusumut periuseqartoqarnissaa, pingaartumik atuarfeqarnermut tunngasut eqqarsaatigalugit. Taamaattumik kommunimi atuariit tamarmik illutaannik misissuinermit ataatsimoortumik ingerlatsisoqassaaq. Taamaaliornikkut qulakkeerneqassaaq siunissami aalajangiinissanut tunngavissanik patajaatsunik peqarnissaa, qaqugu atuariit iluarsartuunneqarnissaannut qaqugukkullu atuariinnik nutaanik sanaartortoqarnissaa pisariaqartassanersoq. Allatut oqaatigalugu aqqiissuteqarallartarnerit unitsinneqassapput. Paarlattuanik aningaasaliinerit erseqqissumik pingaarnersiorneqassapput aamma periusissiatigut tamakkiisumik isiginnittaaseqartoqassaaq, meeqqat inuusuttullu ilinniartitsinermit nutaaliaasunik, atuussinnaassuseqartunik isumassarsisitsisunillu avatangiiseqarsinnaaniassammata.

Meeqqat atuariata pitsanngorsarneqarnissaanut suliniummut ataatsimoortumut atasumik kommunalbestyrelse ilanngullugu immikkut ittumik ilinniartitsisut piginnaanngorsaqinnissaannut 8 mio. koruuninik illuartsivoq. Siunertaavoq ilinniartitsisut suliamut piginnaasaminnik aamma perorsaanermit sakkussaminnik ineriartortitsiarsinnaanissaannut periarfissiisalluni qulakkeerinnissallunilu atuartut ilikkagaqarsinnaassusiannut nalerisimanerannullu kivitseqataasussanik, kiisalu kommune tamakkerlugu atuartitsinerup pitsaassusiata nukittorsarneqarnissaa siunertarlugu.

Suliniutit taakkua kommunalbestyrelsip tunngaviusumik pingaarnersiuneranut ersiutaapput: meeqqat inuusuttullu siunissaannut aningaasaliissuteqarneq. Atuartitsinermit avatangiiserissaarnermit illut inillu atuartitsiviusut kisimik pineqanngillat, kisianni meeqqanik sulisunillu ataqqinninnermit ersersitsineruvoq taakkuami inuiaqatigiinni suliaat pingaarnersaasa ilaannik kivitseqataasuupput.

Meeqqat ineriartornerannut najoqqutassat pitsaanerusut pillugit kommunalbestyrelsip anguniagaanut ilaasumik borgmesteri pisinnaatinneqarpoq inatsimmik allanngortitsinermit sulinaqqullugu, Kommuneqarfik Sermersuumi ulluunerani paaqqinnittarfinni angajoqqaat appasinnerusumik

akiliuteqarsinnaanerannut periarfissamut - soorlu kommunit sinnerini taama ingerlatsisoqartoq. Anguniarneqarpoq ulluunerani neqeroorutitut pitsaasunut assigiinnerusumik atugaqarsinnaanerup qulakkeerneqarnissaa, ilaqutariit aningaasaqarnerat apeqqutaatinnagu.

Nalerisimaneq, pimmatiginninnermik akiuineq ilikkagaqatigiinnerlu

Nalerisimaneq ilikkagaqarnissamut tunngaviliisuusarpoq. Taamaattumik kommunalbestyrelsimit suliniutit ataatsimoortut meeqqat atuarfianni nalerisimanermut pitsanngorsaataasussat, pimmatiginninnermik annikillisaataasussat atuarusunnginnermillu pinaveersaarutaasussat pitsanngorsaavigineqarniarput. 2022-mi atuartunik misissuisitsinermi paasinarsivoq Nuummi meeqqat nunatsinni meeqqanut ukioqatigisaminnut sanilliullutik atugarliornerusut. Taamaattumik naatsorsuutigineqarpoq allaffissornermit iliuusissatut pilersaarummik aalajangersimasumik suliaqartoqarnissaa, atuartut nalerisimanerannut pitsanngorsaataasussamik aamma atuartut ataatsimooqatigiinnerannut angajoqqaat akuutinneqarnerannik imalimmik.

Pimmatiginnittarnerup unitsinneqarnissaanut suliniut ingerlaqqissaaq, ilaatigut suliniut Persuttaaneq Unitsillimik taasaq oqartussaaffeqarfiit allat suleqatigalugit ingerlanneqassaaq. Suliniut meeqqanut inersimasunullu siunnerfeqarpoq ataatsimoorfiit toqqissisimanartut inuiaqatigiinni ilaqutariinnilu tamarmiusuni pilersinneqartarmata. Atuartut nalerisimanngitsut immikkut aamma isiginiarneqassapput, taakkua amerlanertigut ilikkagaqarsinnaassutsikkut nalerisimanikkullu annerpaanik aporfeqartarnerat pissutigalugu.

Siusissukkut iliuuseqarneq aamma ilaqutariinnik tapersersuineq

Isumaginninnikkut suliniutit pitsaassusiat imminnullu ataqatigiinnerat qaffassarumallugit kommunalbestyrelse aalajangerpoq ilaqutariinnut suliaasaqarfimmut aningaasaliinernik siunnerfilinnik arlalinnik suliaqarniarluni. Meeqqanut ilaqutariinnullu suliaasaqarfimmi sipaarniartoqanngilaq. Ilaqutariinnut politikki iluatsilluartoq pissutigalugu suliniutit allanngortinneqassapput taamaaliornikkut ukiumut 7-8 mio. koruunit missaat pinaveersaartitsinermik suliniutitut atorineqarsinnaaniassammata, taakkua qulakkeerinnissutaassapput meeqqat amerlanerit namminneq angerlarsimaffimminni nalerisimallutik inuunissaannut aamma ilaqutariit piffissaagallartillugu ikiorneqartarnissaannut.

Taamatuttaaq suliniuteqareernerup kingorna malinnaaviginnittarneq annertusineqassaaq, inuusuttut atornerluisut siunissami inuusuttut allat assigalugit 23-nik ukioqalernissartik tikillugu tapersersorneqarsinnaaqqullugit. Anguniarneqarpoq angerlarsimaffeqannginnermik, pinerlunniarnermik aamma nakkaattooqqinnermik pinaveersaartitsinerit kiisalu ilinniagaqarnermut suliffeqarnermullu pitsaanerusunik periarfissiinissaq.

Nuummi ilaqutariinnut suliaasaqarfimmi piginnaassutsit pitsanngorsarneqassapput ilaqutariinnut ilitersuisut nutaanik marlunnik ilaneqarnerisigut kiisalu katsorsaanermit aqutsisutut atorfimmik ilassutitut ataatsimik pilersitsisoqarneratigut. Tamatumunnga tunuliaqutaavoq sullitat amerlassusiisa kisitsisitaat qaffakkiartuinnarnerat aamma sulisut tatineqarnerat, tamannalu sullissinerup assigiissaarneranut sulinerullu pitsaassusianut unammillernartorsiortitsisimavoq. Sulisut amerlanerisigut qulakkeerneqassaaq ataqatigiissaarineq pitsaanerusoq, ilaqutariinnut sukkanerusumik ikuiussinnaaneq aamma innuttaasunut sulisunullu patajaassuseq annerusoq.

Tassunga tapullugu siusissukkut iliuuseqarnertut aaqqissuussaasumik sakkussatut ilaqutariinnik siunersioqatigiissitsisarneq atulersinneqassaaq. Periuseq taanna meeqqap taassumalu qanimut attaveqarfignissaata aaqqiissutissat suussusersinissaannut peqataatinneqarnissaannut qulakkeerinnissaaq,

taamaaliorneq angerlarsimaffiup avataanut inissiinernik pinngitsoortitsisinnaavoq. Iliuuseqarneq taama ittoq uppersarsarneqarnikuuvoq, kulturikkut tunngaveqarluni kommunillu Meeqqanut Ilaqutariinnullu politikianut 2025-2035-moortumut naapertuuttuulluni. Anguniagaavoq ilaqutariit namminneq nukissaannik tapersersuilluni ikorfartuinissaq aamma meeqqanut sinaakkutissanik toqqissisimanartunik patajaatsunillu pilersitsinissaq.

Paamiuni najukkami ilaqutariit angajoqqaarsiaasartut siunnersortissaannik pilersitsisoqassaaq, ullumikkut nunap immikkoortuani tassani aalajangersimasumik siunnersorteqanngilaq. Illoqarfimmi nunaqarfinnilu eqqaamiorisani ilaqutariit angajoqqaarsiaasartut amerlasuut qanimut malittarineqarnermik, siunnersorneqarnermik ilitersorneqarnermillu pisariaqartitsipput. Sulisut ilaneqarnerat suliniuteqarnermut pitsanngorsaataassaaq, meeqqat angerlarsimaffiup avataani inissinneqarsimasut nooqattaarnerannik ikilisitsilluni aamma alliartorneranni atugassarititaasut patajaannerulernerannut pilersitseqataassalluni.

Tasiilami suliniutit pitsanngorsarneqassapput Meeqqat Illuanni Pigeer-mi sulisup ilaqutariinnut ilitersuisutut atorfeqalersinneratigut, taanna meeqqanik persuttaagasimasunik kinguaassiuutitigullu atornerlugaasimasunik sullissisinnaassaaq. Piginnaassuseq annertusisaaq tamakkiisumik isiginnittaaseqarluni suliniarnermut qulakkeerinnissutaassaaq meeqqat, ilaqutariit aamma angajoqqaarsiat tapersersorneqarnermik pisariaqartumik pissarsisinnaalissapput politiit, peqqinnissaqarfik aamma atuarfeqarfimmik suliaqarfiit assigiinngitsut qanimut suleqatiginerisigut.

Suliat iliuuserineqartut tamarmik siusissukkut iliuuseqarnerup aamma nalerisimannginnerup annikillisinneqarnissaanut kommunalbestyrelsip ilungersorluni pitsanngorsaarusunneranik ersersitsisuupput, taamaaliornikkut qulakkeerneqaqqullugu meeqqat aamma ilaqutariit - kommunimi sumiluunniit najugallit piffissami eqqortumi tapersersorneqarnissatut neqeroorummik eqqortumik pissarsisarnissaat. Anguniarneqarpoq, meeqqat amerlanerit namminneq angerlarsimaffimminni pissutsini toqqissisimanartuni alliartornissaat, aamma ilaqutariit meeqqaminnut sinaakkutissanik patajaatsunik imminnullu napatissinnaasunik pilersitsinissaminnut tapersersorneqarnissaat.

Sunngiffimmi aamma najukkamut qanittumi neqeroorutit amerlanerusut

Meeqqat inuusuttullu inuunerissunik oqartarnermi piffissaq atuarfiup avataaniittoq aamma pineqartarpoq. Kommunalbestyrelsimiit kissaatigineqarpoq sunngiffimmi, kulturikkut aamma timersornikkut neqeroorutitut periarfissat pitsanngorsarnissaat, taamaaliornikkut meeqqat inuusuttullu ataatsimoorfinni nalerisimanermik aamma piginnaassutsinik ineriartortitsisinnaanissaat anguniarneqarpoq - kommunimi sumiluunniit najugaqaralarunik.

Taamaattumik Nuummi peqatigiiffiit illuannik assigiinngitsunik atuuffilimmik misissueqqaarneq aallartinneqarpoq, illu taanna peqatigiiffilerisunut sammisanullu sinaakkusiissaaq. Ilanngullugu kommunimi illoqarfinni allani inoqarfinnilu illut assingusut pisariaqartinneqarnerat paasiniarneqassaaq. Arsaattarfiit taarsersorneqarnissaannut aningaasanik illuartitsisoqarpoq taamaaliornikkut timersoqatigiiffiit aamma timersoqatigiittartut pitsaannerusunik atugassaqsinnaaniassammata. Ittoqqortoormiini sunngiffimmi sammisassaqtitsivimmut misissueqqaarnermik ingerlatsisoqassaaq, taanna illoqarfimmi meeqqanut inuusuttunullu najoqqutassanik toqqissisimanartunik isumaqarluartunillu neqerooruteqarnissamut qulakkeerinnissutaassaaq. Partiit missingersuusiornermi isumaqatigiissuteqartut kulturilerineq ataatsimut isigalugu tapersersorneqaannassasoq kissaatigaat. Kulturimik ingerlatsinermut najoqqutarisat suli inerisarneqarput. Taamaalilluni partiit missingersuusiornermi isumaqatigiissuteqartut Holmit Illuat Atuakkaq Illuatut atuutilernissaannut aningaasaliissuteqarput. Suliniutit taakkua najukkami naapittarfinnik pitsaasunik amerlanernik tunniusseqataassapput, nalerisimanermut nukittorsaataallutik aamma najukkamut ungasinngitsuni avatangiisinik toqqissisimanartunik pilersitsillutik.

Utoqqarnut isumassuiner Mullu ataatsimiititaq

Kommuneqarfik Sermersuumi innuttaasut utoqqaanerusut ukiuni aggersuni malunnaatilimmik amerleriassapput. Tamanna sulisut kivissinnaasaannut, pitsaassutsimut aamma uagut utoqqarnik paaqqutarinnittariaatsitut aqqissuussinitsinnut piumasaqaatinik angisuunik nassataqarpoq. Kommunalbestyrelsimit kissaatigineqarpoq taamannak ineriartortoqarnera ilungersuutigalugu eqqumaffigineqassasoq qulakkeerlugulu utoqqalisut tamarmik toqqissisimanartumik ataqqineqarlutillu utoqqalissasut, isumassorneqarnermik ataqqineqartumillu pineqartariaqarnermissut pineqarlutik.

Saniatigut kommunimit misigineqarpoq innuttaasut arlallit tarnikkut imaluunniit inooqatigiinnikkut piginnaanikillisasut ullumikkut utoqqaat angerlarsimaffiini inissinneqarsimasut, taakkunani atukkat taakkua pisariaqartitaannut naleqqussarsimanngikkaluartut. Taamaattoqarnera utoqqaat inuunerminni ukiuni sinneruttuni eqqissisimaarnissaminnut, nalerisimanerminnut inuunerisalu pitsaassusiannut ajornartorsiortitsisinnaavoq. Taamaattumik kommunalbestyrelsimit aalajangerneqarpoq innuttaasunut tarnikkut piginnaanikillisasunut immikkut immikkoortortamik sanaartortoqassasoq. Siunertaavoq neqeroorutiniq pitsaanerusunik siunnerfeqarnerusunillu pilersitsinissaq, utoqqalisut aamma tarnikkut qajannartut avatangiisini taakkua pisariaqartitaat tunngavigalugit pilersinneqarsimasuni paaqqutarineqarnermik tapersorneqarnermillu eqqortumik pissarsisinnaaqqullugit. Taamaalluni utoqqarnik paaqqutarinninnermi ataqqinninnerup pitsanngorsarneqarnissaanut pingaarutilimmik alloriartoqarpoq, saniatigullu innuttaasunut tarnikkut ilungersunartorsiortunut neqeroorutiniq immikkut naleqqussagaanerusunik inuppalaarnerusunillu pilersitsisoqassaaq.

Isumaqatigiinniarnernut atasumik utoqqarnut aningaasaliissutissat ataatsimoortut politikikkut akuersissutigineqarput, taakkua qulakkeerinnissutaassapput innuttaasut pisariaqartitaat aallaavigalugit kommune siunissami utoqqarnut neqeroorutiniq nutaanik piareersaanissaanut, pilersarusiornissaanut sanaartornissaanullu. Utoqqarnut aningaasaliissutini pineqarput suliniutit misissueqqaarnermik ingerlatsinerimi inerisarneqalereersunut atugassat - taakkununga ilaapput puiguttortunut angerlarsimaffimmik Nuummi sanaartornissamut pilersaarut, Tasiilami utoqqaat angerlarsimaffiat kiisalu Ittoqqortoormiini utoqqaat najugaqatigiiffiat. Taakkua aningaasaliissutitut ataatsitut katersuunnerisigut aqutsineq pitsaanerusoq, eqaassuseq aamma pisariaqartitsinerup annerpaaffia naapertorlugu pingaarnersiuisinnaaneq periarfissaassapput. Taamaalluni utoqqarnut aningaasaliissutit aqutugalugit kommunimi tamarmi utoqqarnut suliasaqarfimmik tamakkiisumik isiginnittaaseqarluni sanaartortoqarnissaa tunngavissaleneqarpoq.

Taassuma saniatigut utoqqarnut politikki nutaaq suliarineqassaaq, ukiuni aggersuni utoqqarnut suliasaqarfimmi siunnerfimmik inissiisussaq, qulakkeerlugulu suliniarneq innuttaasut pisariaqartitaannik, najukkami pissutsinik aamma innuttaasut katitigaanerisa allanngoriartornerannik aallaaveqarnissaat.

Aqutsineq pitsaanerusoq aamma ingerlatsinerit angusaqarfiunerusut qulakkeerniarlugit ilanngullugu isumaginninnermi suliasaqarfimmi suliat tamarmik ingerlarnginik misissuisoqassaaq, taamaalluni piaarinani kukkunerit, utaqqisitsinerit aamma ingerlatsinerit katitigaasut ikisinneqassapput.

Nuup illoqarfiata qeqqani utoqqaat amerliartuinnarnerat arajutsisimanagu pisariaqartitaasalu matussusernissaat qulakkeerniarlugu amerlanerillu ungasinngitsumi ornissinnaasaannik pilersitsiniarluni Utoqqaat Illuanni sammisaqartitsivimmi inissat amerlineqassapput. Sanaartukkatigut atortussat pisariaqartut pigineqareernerat pissutigalugu suliniarnermi sulisut amerlassusiat aamma atortussanik naapertuuttunik pissarsiniarnissaa ukkatarineqassapput. Inissanik amerliliinerup kingunerisaanik Nuummi utoqqarnut ulluunerani neqeroorutit amerlineqassapput kiisalu ataatsimoorfiit, sammisatigut aamma najugaqarfigisanut ungasinngitsuni inuunermut pitsanngorsaait periarfissaqarfiunerulissallutik.

Isumaginninnermut inunnullu innarluutilinnut ataatsimiititaq

Kommunalbestyrelsimit kissaatigineqarpoq inuiaqatigiinni inuit ataasiakkaat kisimiillutik imminut nakkutigisassanngortinneqannginnissaat, aamma innuttaasut tamarmik - inuunerat qanorluunniit ikkaluarpata - ikiorneqarnermik pisariaqartitaminnik pissarsisinnaanissaat. Inuuniarnikkut naligiingissutsit akiorneqarnerannik ingerlatsissaagut aamma pinaveersaartitsineramik suliniutit pitsanngorsassavagut, amerlanerit toqqissisimallutik namminnerlu qanittuminni avatangiisini ataqqineqartumik inuusinnaaqullugit.

Taamaattumik imminut toqunnissamik pinaveersaartitsineramik suliaq annertusassavarput pingaartumik inuusuttut akornanni atuarfinni aamma sunngiffinni neqeroorutini, tamaani nalerisimannginneq aamma tarnikkut ilungersuutigisat siusinnerusumik aamma tamakkiisumik isiginnittaaseqarluni naapinniarneqartassapput. Kommunimit kissaatigineqarpoq qulakkiissallugu meeqqat inuusuttullu kisimiinginnissaat, kisiannili inersimasunit naapinneqartarnissaat, taakkua pilertortumik qisuariarsinnaassapput, ajornartoornermik pitsaaliuisinnaasut aamma ataatsimooqatigiinnik nukittuunik toqqissisimasunillu pilersitsisinnaasut.

Suliniarnerup taassuma ilaatut inissiaqarfinni sumiiffinni aalajangersimasuni isumaginnittutut viceværtit atugaalissapput. Taakkua ulluinnarni sumiiffinni saqqumisumiittassapput qanimut attaveqaataasassallutik toqqissisimanermik tatiginninnermillu pilersitsisassallutik inissiaqarfinni najukkani avatangiisini nalerisimasoqarnissaanut tapertaallutik. Viceværtit innuttaasup kommunillu akornanni attaveqaataasutut pingaarutilimmik atuuffeqassapput, aamma inissiaqarfinni kiserliornermut, aaqqiagiinnginnernut atugarliortunngornermut pinaveersaartitsinermut ilaassapput.

Saniatigut inunnut innarluutilinnut politikkimik nutaamik sulineq aallartinneqassaaq, taanna pitsaassutsimik qaffatsitsissaaq inuillu timikkut aamma tarnikkut pisinnaasamikkut killeqalersimasut eqqortunik neqeroorfigineqartarnissaannik taamatullu eqeersimaartumik naleqartumillu inuusinnaanermut periarfissaqarnissaannik qulakkeerinneqataalluni. Politikki taanna innuttaasut ataqqineqarlutik, eqaatsumik periuseqarluni aamma ulluinnarminni qinigassaqlutik naapinneqartarnissaannut tapertaassaaq.

Tassunga atasumik maannamut ataasiinnarmik isaaveqarnermik (One Door) periuseqarneq kommunalbestyrelsimit nalilersuiffigineqassaaq, taassuma siunertaraa innuttaasunut innarluutilinnut suliamik ingerlatsinerup ersarinnerulernissaa. Nalilersuinikkut qulakkeerneqassaaq taamannak aaqqissuussineq ilumut suliamik ingerlatsinermi ikiorsiissutitut siunnersorneqarnernullu naapertuuttumik eqaatsumillu tapersiisimanersoq - aamma aaqqissuussaq naatsorsuutigisaasutut atuuffeqarnersoq: Ataasiinnarmik isaaveqarneq, allaffissorneq minnerusoq aamma innuttaasumut ersarinneruneq. Nalilersuineq pitsanngorsaatissanik tikkuussissappat, taava taakkua aaqqiisutaasinnaasut aalajangersimasut siunertaralugit piviusunngortinneqassapput, sullissinermi ingerlatsinermilu sulii ataqatigiinnerusumik aamma ikorfartorneqarnissamut eqqortumut aqutissap sivikinnerunissaanik qulakkeerinissutaassallutik.

Inoqarfinnut ataatsimiititaq

Kommunalbestyrelsimit kissaatigineqarpoq kommunimi tamarmi ineriartornerup pitsanngorsarnissaa aamma qitiusumit aqutsinerup qimakkiartornerata nanginneqarnissaa, taamaaliornermi Paamiuni aamma Tasiilami pitsaasunik angusaqarfioreerpoq. Matumani najukkami ingerlatsinermik aaqqissuussat kultureqarnerup aamma sunngiffilerinerup iluani kiisalu ulluinnarni suliaasanik ingerlatsinermi annermik akisussaaffeqalerput. Periuseq taanna maanna Ittoqqortoormiunut siammarneqassaaq, tamaani illoqarfinmi aqutsisunik pilersitsisoqassaaq taakkua inuttarissavaat illoqarfinmi pisortaq aamma ingerlatsinermi aqutsisoq, taamaalilluni qaninnertut aqutsisoq innuttaasunut qanittumiilissalluni aamma najukkami pisariaqartitat pilertornerusumik naaperiarneqarsinnaanngussallutik. Ilanngullugu kissaatigineqarpoq akisussaaffinnik agguuaassisinnaaneq misissorneqaqqullugu, ilaatigut Nuup avataani utoqqaat angerlarsimaffiini inissat aamma iluaqusersuutitut tunngasut. Kommunalbestyrelsip kissaatigaa aqutsinerup qitiusumit ingerlanneqarunnaariartornerata ukiup affakkuutaartumik killiffissiorneqartarnissaa.

Tamat oqartussaaqataanerannik nukittorsaajumalluni nunaqarfinmi siulersuisut isumasioqatigiisinneqarnerat ingerlanneqassaaq, aamma najukkami ataatsimiititaliat missingersuutaat nikisinneqassanngillat, taamaaliornikkut erseqqissumik oqartussaaqarsinnaaqqullugit aamma namminneq pingaarnersiukkaminut aningaasatigut atugassaqarsinnaaqqullugit.

Kommunip sullissinerata innuttaasunut qaninnerulernissaanut suliniutit ilaattut ukiuni marlunni misiligutaasumik suliniummik aallartitsisoqassaaq, taanna Tasiilap eqqaani nunaqarfinni anginerni pingasuusuni innuttaasunik sullissinermut pitsanngorsaataassaaq. Ullumikkut innuttaasunik kiffartuussivimmi sulisut kommunimi suliaaqqarfinnit arlalippassuarnut tunngasunik suliaasanik katitigaaqisunik suliaqartuupput, amerlanertigut kisimiillutik aamma amerliartuinnartunik suliaaqqartarlutik. Sammisat amerlasuut, suleqammik siunersioqateqarsinnaannginneq aamma angallanniarnikkut pissutsit ilungersunartut sulinerneq avatangiisitigut kiisalu sullissinerup pitsaassusianut unammilligassaqqartitsipput. Misiligummik suliniutikkut najukkami sulisoqarneq pitsanngorsaavigineqassaaq, suliaasat amerlanerit innuttaasumut qanittumik naammassineqarsinnaaqqullugit, sulisut ulluinnarni suliatigut tapersersorneqalissapput innuttaasumiillu sullinneqarneq pitsaasoq, toqqissisimanartoq tikiinneqariaannaasumiittorlu misigineqassaaq.

Taakkua saniatigut illoqarfinnut Nuup avataaniittunut illoqarfinnut periusissiat aallartinneqarput, illoqarfiit siulliit Paamiut aamma Ittoqqortoormiit innuttaasunik ataatsimiititsinernik ingerlatsiffigineqarlutik. Periusissiat najukkami ineriartornermut tapertaassapput taakkualu 2026-p ukiuani siullermi naammassissanganneqarput. Tamanna tunuliaqutaralugu kommunalbestyrelse suliniutit aaqqissuunneqarnerat pingaarnersiorneqarnerallu pillugit aalajangiissaaq, najukkami anguniakkat innuttaasut qanimut oqaloqatigalugit anguneqarsinnaaniassammata.

Kommunimi tamarmi aalisarnermik piniarnermillu inussutissarsiutit pitsanngorsarneqarnerat

Partiit missingersuusiornermi isumaqatigiissuteqartut 2026-mut missingersuutikkut kissaatigaaq aalisarnermik piniarnermillu inuussutissarsiutit Kommuneqarfik Sermersuumi kulturimut, aningaasaqarnermut aamma ineriartornermut tunngaviummik sukarsuutut atuutissasut. Suleqatigiinnissamut isumaqatigiissummut assingusumik isumalluutit ataatsimoorussatsinnik piujuartitsineq pingaartillugu ingerlatsissaagut, najukkami aalisarnermut siunnersuisoqatigiit aamma kattuffiit qanimut oqaloqatigalugit kiisalu anguniakkatut qulakkeerlugu isorliunerusut inuussutissarsiummik ineriartortitsinermut najoqqutassanik pitsaanerusunik pissarsinissaat. Qitiusumik suliaasatut isigineqarpoq aalisartunut piniartunullu patajaannerusunik ullutsinnullu naleqqunnerusunik atugassaqqartitsinissaaq,

attaveqaasersuutit pitsanngorsarnerat aamma inuussutissarsiummut periarfissanut tapersersuineq, tuniniaaviit nutaat kiisalu tunisassiat naleqarnerulersinnerannut ineriartortitsisoqarnissaa anguneqarsinnaaniassammata.

Kommuneqarfik Sermersuumi umiatsiaaqqanut sannaviit aamma puttasut tamarmik aqqissuussaasumik paasinaqqissaarneqarnerisa 2026-mi naammassineqarnissaa kissaatigineqarpoq. Siunertaavoq amigaatit suunerisa paasineqarnissaat, aserfallatsaaliinissamut pisariaqartitsinerup tamakkiisumik paasineqarnera qulakkeerlugulu inoqarfiit mikinerit tamarmik ullutsinnut naleqquttunik, isumannaatsunik atorsinnaasunillu atugassaqartitaanissaat. Taakkua ilaatigut tassaapput amoorutit, kuitsiviit, inaalitsiviit, sannavinni atugassarititaasut kiisalu eqqakkanut atortunullu nunaminertat.

Saniatigut kissaatigineqarpoq Tasiilami ineriartortitsinermi kommune suleqataassasoq, Tasiilami aalisarnermik inuussutissarsiummik imminut napatissinnaasumik ineriartortitsinermi tapersersuineq aqutugalugu. Kommune najukkami sulialinnut ikiuukkusuppoq siunnersuinermik, atortutigit, piginnaasanik ineriartortitsinikkut aamma aalisarnermik inuussutissarsiummik aningaasarsiorfiusinnaanerusumik pitsaasumillu pilersitsinissamut sinaakkutissanik pisariaqartunik pilersitsinermut. Aallarnisaaneq suleqatigiinnissamut isumaqatigiisummi inuussutissarsiutitut periarfissat pitsanngorsarnissaannut, assigiinngisitaartumik aningaasarsiorsinnaaneq aamma isorliunerusuni attaveqaasersuutit pitsanngorsarnissaannut anguniagaasunut naapertuuppoq.

Aningaasarsiorfissanik nutaanik tapersersuinermit aamma najukkani suliareqqiisinnaanermut periarfissanut atasumik Ittoqqortoormiini qerititsiveqarfitoqaaq ammassaaq illoqarfimmi piniartunit akeqanngitsumik atorneqarsinnaalissalluni. Kommunalbestyrelsimit kissaatigineqarpoq najukkami piniarnermik inuussutissarsiutit pitsanngorsarneqarnissaa piginnaanngorsarluni pikkorissaanerit aqutugalugit, ilaatigut umimmaat qiviuinik qissinikkut, kiisalu tunisassianik tuniniaaneq naleqarnerulersitsinerlu pillugit siunnersuinerit aqutugalugit. Pingaartinneqarpoq kommunip tungaanit suliniutinik siunnerfilinnik aallartitsisoqassasoq Tunumiit Kitaanut tuniniaasinnaanermut periarfissanik pitsanngorsaataasunik, taakkununga ilanngullugit ullumikkut piniartut tuniniaasinnaaneranant killilersuutaasut qulaajarneqarlutik annikillisinneqarsinnaanerannut iluaqutaasut suussusersineqarnerat anguneqassalluni. Tassunga ilaapput umimmaat neqaannik aamma qiviuannit nuersagassiat nunanut allanut tunisassiarineqarsinnaanerannut qanoq tapersersuisoqarsinnaanersoq. Suliniutikkut suleqatigiinnissamut isumaqatigiisummi naleqalersitsinerup assigiinngisitaartuunissaanut aamma najukkani naleqalersitsinissamut periarfissanik ineriartortitsinermit kissaatitut anguniarneqartumut tulluarpoq, taamaaliortoqassaaq ilaatigut assartuussinermit aqqiissutaasinnaasunik, tuniniaaviusinnaasunut isersinnaanerup misissorneqarnerisigut, taamatullu atorneqarsinnaasunik pisariaqartitsinerit, taamaalilluni Ittoqqortoormiini ullumikkut inuussutissarsiutitut ilippanaammik atorneqanngitsumik atuisinnaanermut periarfissat pitsaaneruleqqullugit. Tamakkua ataatsimut kattullutik kommunimi tamarmi inuussutissarsiornermit pitsanngorsaataassapput aamma aningaasaqarnikkut ineriartornermit tatitunerusumut imminullu napatissinnaanerusumut ilanngusseqataassallutik.

Teknikki avatangiisillu

Sermersuumi illoqarfimmik ineriartortitsineq pinngortitamut, kulturimut oqaluttuarisaanermullu ataqqinnilluni pissaaq. Kommunalbestyrelsimit kissaatigineqarpoq illoqarfimmi illoqannginnersanik toqqissisimanartunik, paarilluakkanik qaammaqqusersukkanillu pilersitsisoqassasoq tamaanngaanniit illoqarfiup qanittuani pinngortitaq sukisaarsaarfiillu ajornanngitsumik tikinneqarsinnaassallutik. Saniatigut inissianik amerlanernik sanaartortoqassaaq inuunerup ingerlanerani aqqusaakkanut ilaqutariinnullu assigiinngitsunut tulluurtunik, taamaaliorluni innuttaasut amerlanerit namminneq inuunerminni najoqqutassanik naleqquttunik pissarsisinnaaqqullugit. Arctic Parkip qitiusumik pilersaarutitut ineriartortinneqarnera nanginneqassaaq, illoqarfiit pingaarnersaanni taanna illoqannginnersatut kulturikkullu katersuuffiussaaq.

Aalajangiinerni tamaginni silap pissusia avatangiisillu ilanngunneqartassapput. Illoqarfiit ineriartortissavagut isumalluutivut kinguaariit tulluuttut inuussutissaannut pilliutiginaq. Taamaattumik kommunalbestyrelse pilersaarutitik angisuunik aqqissuussaasumik piffissamullu ungasinnerusumut atuuttussanik pilersaarusiortoq. Aalajangiinerit pilertornerusumik tigussaasumik naammassisanngorlugit timitalerneqartalernissaat qulakkeerumallugu sulilersitsiniaaneq aamma misissueqqaarnerit ingerlanneqartut naammassineqarnissaat immikkut ukkatarineqarput. Taassuma saniatigut siunnersuutigineqarpoq sanaartornermut aningaasaliissutit atorineqarsinnaasut pilersaarutitut inerisarneqareersunut piviusunngortinneqarnissamut piareersimasunut siunnerfeqarnissaat. Ilanngullugu sulissutigineqarpoq ukiunut sisamanut pilersaarut misissueqqaarnerit naammassereersut qaqugu sanaartornermik suliniutitut aallartinneqarsinnaanerannik ersersitsisussaq. Tamanna sanaartornerup aqunneqarnerani ammasumik ingerlatsinermik, naatsorsoruminassutsimik aamma pisariinnerusumik aqutsinermik pilersitsissaaq.

Nunaminertanik sanaartornissamullu akuersissutitik qinnuteqarnermi utaqqisarneq sivikillisinniarlugu kommunalbestyrelsimit kissaatigineqarpoq avataanit suliaqarfirmik suliaqartartut kommunimit annerusumik atorineqartalernissaat, taakku oqartussaaffeqarfiup suliarinninneranut atatillugu piareersaanermik atortussallu pitsaassusissaannik qulakkeerinneqarni ikiuuttassapput. Anguniarneqarpoq sulianik sullissinermi innuttaasunut inuussutissarsiortunullu sukkannerusumik eqaannerusumillu qulakkeerinneqarnissaq, kiisalu kommunip ineriartortuarneranut tapersiisumik pitsanngorsaasoqarnissaa.

Attaveqaasersuutit pitsanngorsarnerannut atasumik aqquserngiornissamut aningaasanik illuurtitsisoqassaaq, aqquserngit, ikaartarfiit tummeqqallu aserfallatsaalineqarniassammata aamma innuttaasunut, tikeraanut inuussutissarsiortunullu isumannaanneruleqqullugit. Tasiilami asfaltilersuineq immikkoortup tullianik suliaqarnikkut nanginneqassaaq taamaalilluni aqqusinermi angallanneq isumannaannerulissalluni atoruminarnerulissallunilu. Kommunimit qulakkeerneqarpoq ESANI A/S-ip ingerlatsineranut akiliuteqarnerup ingerlaannarnissaa, taamaalilluni tigooraavik avatangiisinut akisussaassuseqartumik eqqakkanik passussinernik nangitsisinnaniassammat, tamanna peqqissutsimut nalerisimanermullu pingaaruteqarqimmat.

Tasiilami atortussaasivimmik nutaamik pilersitsisoqarsinnaaneranut misissueqqaarnermik aallartitsisoqassaaq, najukkami ingerlatsinermut aserfallatsaaliinermullu periarfissat pitsaanerit qulakkeerneqarqullugit. Ilanngullugu Innaqqiit eqqaanni ujaqqanik immiisoqarsinnaanera pillugu misissueqqaarnermik ingerlatsisoqassaaq, sumiiffiup taassuma siunissami atorineqarsinnaaneranut tunngavimmik patajaannerusumik pilersitsinissaq siunertarlugu.

Upalungaarsimanermut pilersaarut aamma immikkoortumut pilersaarutip nalilersuiffigeqqinnissaannut piumasaqaateqartoqarpoq.


Suliniutit taakkua illoqarfimmik aamma sanaartornermik ineriartortitsinermit tamakkiisumik isiginnittaaseqarnermit tapersersuisuupput, pilersaarutit angisuut sukkatsinneqassapput, ingerlatsineq attaveqaasersuutillu piginnaaneqarnerulersinneqassapput aamma illoqarfimmik ineriartortitsineq silap pinngortitallu pissusiinut oqimaaqatigiissaakkamik ingerlanneqassapput. Anguniarneqarpoq Kommuneqarfik Sermersooq tassaassasoq piujuartitsinermit tunngaveqarluni ineriartortoq - aningaasaqarnikkut, inooqatigiinnikkut aamma avatangiisinut tunngatillugu – aammalu kommunimi tamarmi sanaartornermit aningaasaliissutit ulluinnarnik nutaaliaasunik, aturuminassusilinnik toqqissisimanartunillu tapersiissuteqarfiusut.

Eqikkaaneq


2026-mut missingersuutitut isumaqatigiissutit ersersippaa kommunalbestyrelsimi - aningaasaqarnikkut, inooqatigiinnikkut inuttullu ataatsimoorluni akisussaaffimmik tigusinissamut piumassuseqartoqarnera.

Kommunimik pilersitserusuppugut inerikkiartornerup atugarissaarnerullu ingerlaqatigiinnerannik ingerlatsiffiusumik, innuttaasunit kommune tusarnaartutut, suleqataasutut aamma angusaqarfiusartutut misigineqassaaq. Naak Kommuneqarfik Sermersuup aningaasaqarnera patajaatsumik inissimagaluartoq taamaattoq sulit aningaasaliinerit uatsinneersut avataaneersullu pilersinnissaat kommunitisinni pisariaqartippagut. Kommunalbestyrelsimi kommunitisinnut tamarmut aningaasaliisoqartuartarneratigut inuussutissarsiornikkut, inissaqarniarnikkut, susassaqartitsinikkut timersornermilu ineriartortitsineq qulakkeersimasinnaassavaa.

Ataatsimoorluta Kommuneqarfik Sermersuumik pilersitsivugut, maani atugarissaarnerup, puijuartitsineq aamma inerikkiartorneq sutigut tamatigut naleqartitatut atuupput.



Avaaraq Olsen,
Borgmesteri



Arnanguak Steenholdt,
Inuit Ataqtigiit



Poul Petersen,
Demokraatit



Dorte-Marie Mogensen-Fontain,
Siumut



Peter Utuange,
Naleraq